

## SAOPŠTENJE ZA JAVNOST X JAVNA DEBATA „POČINIOCI I ŽRTVE KRIVIČNIH DJELA SU NAŠA DJECA – SPRIJEČIMO MALOLJETNIČKO PRESTUPNIŠTVO“

Sarajevo, 29.09.2012. godine

28.09.2012. godine u „Hotelu Grand“ u Sarajevu održana je X javna debata „Počinioci i žrtve krivičnih djela su naša djeca – spriječimo maloljetničko prestupništvo“. X javna debata predstavljala je kontinuitet četverogodišnjeg javnog zagovaranja u nastojanju da se riješi problem maloljetničkog prestupništva, putem otvorenog dijaloga između svih nosilaca odgovornosti za rješavanje problema, kako bi se stvorile jasne smjernice za konkretne i produktivne aktivnosti u borbi protiv problema.

Tok i sadržaj debate bili su determinirani zaključcima i preporukama sa devet ranije održanih debata, a cilj X javne debate bio je odgovoriti na sva neriješena pitanja, odgovornost uputiti na prave adrese, prepoznati gdje postoji problem u lancu izvršavanja preuzetih obaveza i definisati preporuke za njegovo rješenje. Debata je bila podijeljena u osamnaest cjelina, a svaka od njih je bila posvećena određenom sektoru koji ima odgovornost u rješavanju problema. U konačnici je bilo vidljivo da bez zajedničke saradnje, informisanja o radu i njegove transparentnosti svih sektora ne može doći do rješavanja problema.

Četiri godine od održavanja prve javne debate posvećene ovoj temi pomaci na rješavanju problema maloljetničkog prestupništva postoje, ali su jedva vidljivi. Deseta javna debata je pokazala da Zakon o zaštiti i postupanju sa djecom i maloljetnicima u krivičnom postupku postoji samo u Brčko distriktu i Republici Srpskoj, dok se u Federaciji i nakon četiri godine obećanja još uvijek čeka na ovaj Zakon. Četiri godine od prve javne debate se čeka da se uslovi boravka maloljetnika u KPZ Zenica usklade sa međunarodnim standardima, a maloljetnici i dalje borave zajedno sa starijim zatvorenicima. Zaključak X javne debate je da još uvijek nije izgrađen i pušten u funkciju zatvor za maloljetnike u Orašju. Direktor Zavoda Hum na debati je istakao da zgrada Zavoda nije u cjelosti adaptirana i ne radi u svom punom kapacitetu, te da i do X javne debate nije uposleno dovoljno osoblja za rad sa prestupnicima, što su i druge ustanove za smještaj maloljetnik prestupnika prepoznale kao problem. Zaključeno je da postoje i brojne zakonske nedorečenosti o statusu centara i zatvora, kao i o njihovom finansiranju. Uočena je i netransparetnost dodjele finansijskih sredstava za realizaciju projekata namijenjenih preveniranju maloljetničkog prestupništva, kao i nedostatak vidljivosti rezultata rada NVO-a kroz ovakve projekte. Nova Strategija za borbu protiv maloljetničkog prestupništva nije usvojena na državnom nivou, a prestankom važenja stare Strategije (čiji je pretežit dio ostao nerealizovan) nestao je i jedini dokument koji je na sistematski i cjelovit način tretirao maloljetničko prestupništvo na teritoriji cijele zemlje. U odnosu na ranije javne debate nije bilo pomaka ni na upošljavanju novih socijalnih radnika, te je još jednom istaknut problem manjka kadra koji bi radili sa maloljetnim prestupnicima. Deseta javna debata je na brojna neodgovorena pitanja odgovorila sa „NE“, novim obećanjima koja trebaju biti ispunjena u najbržem mogućem roku, novim prebacivanjima odgovornosti i isticanjima problema.

Svijetli primjeri o pozitivnim promjenama na debati su bili vidljivi jedino od onih koji direktno rade sa maloljetnicima u sukobu sa zakonom, te je Disciplinski centar Sarajevo na gotovo sva negativno odgovorena i neriješena pitanja sa ranijih debata, odgovorio pozitivno, dokazavši da uz trud, volju i odgovornost, ne postoji nerješiv problem.

PROJEKAT: „Počinioci i žrtve krivičnih djela su naša djeca – spriječimo maloljetničko prestupništvo: u lokalnim zajednicama“



**MOZAIK**  
FONDACIJA  
ZA RAZVOJ  
ZAJEDNICA

„Program za poduzetnu omladinu“ je jedna u nizu aktivnosti koja se realizuje u okviru projekta koji finansira italijanska vlada, a implementira Svjetska banka u BiH.“



Općina Novo Sarajevo



Općina Ilidža

Desetom javnom debatom se željelo postići da svi subjekti odgovorni za problem, aktivnim učešćem doprinesu njegovoj prevenciji. Dok se debatom nastojalo postići rješenje maloljetničkog prestupništva, njegova posljedica se još jednom pokazala – maloljetničko prestupništvo na trolejbuskoj stanici Drvenija u Sarajevu upozorilo je na važnost ovog problema. Iako je dopis za aktivno učešće na X javnoj debati upućen svim medijima, nijedan predstavnik medija ne samo da nije uzeo aktivno učešće u debati, već nije ni informisao o ovom događaju. Sa druge strane, vijest o tragičnom događaju na Drveniji se veoma brzo proširila u svim medijima. Nejasno ostaje kako je posljedica problema postala nevažna u odnosu na njegovo rješavanje, kao i zašto su mediji zanemarili važnost svoje uloge u rješavanju ovog problema.

Istinsko rješavanje problema mora značiti mnogo više od praznih obećanja, dugogodišnjeg čekanja na usvajanje zakona, otvaranja odgojno-popravnih domova, postizanja međunarodnih standarda u tretmanu maloljetnika. Istinsko rješavanje problema mora značiti otvoren dijalog i transparentan rad kako vladinog, tako i nevladinog sektora, a to je jedino moguće ostvariti javnom prilikom za dijalog i pružanje tačnih i provjerljivih informacija o radu. Stoga CKD insistira na kontinuitetu javnih debata, na jedinstvenoj prilici za dijalog između svih društveno odgovornih subjekata i identifikovanju odgovornih za rješavanje problema. Cilj javnih debata nije da se rad bilo koje od odgovornih institucija obezvrijedi, već da zajedničkim djelovanjem rezultati rada budu što uspješniji i vidljiviji.

Nakon održavanja jubilarne X debate CKD izražava iskrenu zahvalnost svim institucijama koje su svojim kontinuiranim prisustvom i aktivnim učešćem na debatama doprinijeli rješavanju problema, adresiranju poteškoća u njegovom rješavanju i iznošenju načina za njihovo prevazilaženje. Zaključci i preporuke sa X javne debate biće objavljeni na službenoj stranici Centra za kulturu dijaloga [www.ckdbih.com](http://www.ckdbih.com), a organizator izražava nadu da će doprinijeti vidljivijim rezultatima i pozitivnim odgovorima na pitanja koja su ostala negativno odgovorena i nakon X javne debate, te da će mediji prepoznati važnost njihove preventivne uloge i da će odati priznanje radu svih učesnika debate, informišući javnost o njihovom sadržaju.

**PROJEKAT: "Počinioci i žrtve krivičnih djela su naša djeca – spriječimo maloljetničko prestupništvo: u lokalnim zajednicama"**



"Program za poduzetnu omladinu" je jedna u nizu aktivnosti koja se realizuje u okviru projekta koji finansira italijanska vlada, a implementira Svjetska banka u BiH."



Općina Novo Sarajevo



Općina Ilidža